

欽定剿平三省邪匪方略

欽定剿平三省邪匪方略續編卷十八

癸亥年

九月初二日

甲午

勒保奏言

臣

連日哨探各路情

形賊氛漸清地方日臻寧謐隨征兵勇自應次

第裁減所有雲南官兵前已全數凱撤貴州官

兵現在陸續調赴綏定俟歸集查點清楚再令

凱旋至四川等省官兵在各路搜捕者尙多亦

當酌量裁減查四川軍營尙有建昌普安等營

官兵一千一百餘名又防守白水江有松潘鎮
標官兵七百餘名查建昌普安二營在川省西
南邊境地雜番夷自宜早遣歸伍庶邊境有備
無虞所有建昌普安二營官兵一千一百餘名
現已凱撤起程又松潘鎮所轄地方在川省西
北相近青海與甘肅西寧毘連爲邊圉緊要之
地刻下白水江一帶已無賊氛所有松潘鎮官

兵七百餘名現亦起程回營又隨征鄉勇中除
情愿入伍者另行辦理外其中有家有業情願
回籍者亦應與官兵相間裁撤臣現在撤出各
路隨征鄉勇一千一百八十二名又撤回嘉陵
江巡遊征勇八百十四名均調至綏定將器械
按名收繳賞給路費并歸途口食錢文并派弁
員管帶送交原籍地方官取保安業至連日各

路官兵防哨情形據臬司劉清派出軍功鞏貴
等在通江鹿會山梓潼廟石板溝等處老林先
後搜獲四名又據副將桂涵在黑炮山搜獲零
匪十二名又在關口坪搜獲零匪十六名又在
峩城山搜獲零賊十四名據署雲陽縣事知縣
梁敦懷稟稱有零賊申之亨等八名赴縣投首
查係官兵剿散之賊當卽批飭妥爲安插至川

東川北兩路防兵連日與楚陝二省官兵彼此
會哨均報並無賊蹤惟太平大寧一帶老林尙
有零星未淨之賊已飭總兵田朝貴帶同叅將
羅思舉遊擊周士貴等分派兵勇節節排搜頃
據大寧縣知縣郭南英稟稱豐紳發交匪犯黃
貴審訊供認卽戕害穆克登布之逆犯余佐斌
改名逃竄被獲

臣

現親提查訊至軍興以來承

辦軍務各文員因勞成病旋即身故者不下數十人茲臣確加查核擇其勞績較著者共二十二員繕單恭呈

御覽可否量加軫卹以慰幽魂再原任建昌道石作瑞前於革職後開復原官遇缺補用會奉有

諭旨俟大功告竣後如果始終奮勉再行請旨茲該員辦理軍需又逾三載始終不懈可否懇

恩賞還花翎以示鼓勵之處出自

逾格鴻慈再有已革候補縣丞沈昭興前隨經畧額勒登保軍營辦事以藉病逗遛叅奏革職奉

旨發往伊犁効力贖罪嗣後額勒登保查明該員前此患病屬實復經奏懇釋回仍發四川軍營効力該員自伊犁釋回後仍在軍營効力不辭勞瘁應懇

聖恩准其就近在川照例捐復補用以示矜卹又

臣

前准部咨議覆經畧額勒登保等奏准承辦軍
務出力文員由各督撫等詳細查明分別辦理
伏查川省軍興八載連年辦理軍務及經管團
練大小各官不下五百餘員各盡心力不辭勞
瘁

臣

擇其奮勉出力尙應加獎者六十二員謹

繕清單恭呈

御覽此外尙有候補同知黃爲琳等五十三名皆係
未經得缺人員著有微勞現在另造清冊各部
應懇

聖恩准其各歸本班儘先補用再川省道府丞倅牧
令以至佐雜等官皆辦軍務勞績各有等差除
將辦理日淺及無甚勞績者概行扣除外所有
鹽茶道姚令儀等二百六十五員照例分別一

卷之三 奏議 聖恩准照軍功優敘之例分別給予議敘奏入
二三等造冊咨部應懇

聖恩准照軍功優敘之例分別給予議敘奏入

上命軍機大臣傳諭勒保曰四川本省從征官兵內
建昌普安二營及松潘鎮係邊圉緊要之地勒保
先將各該處官兵撤歸原伍並將鄉勇等相間裁
撤所辦皆是至各路官兵先後搜獲零賊共四十
六名又有投首者八名可見從前巡哨員弁率以

並無賊蹤具報未足深信今數日之間復搜獲四
五十名恐大山老林內似此竄匿餘匪甚多尙未
能一律淨盡勒保總當飭令鎮將等實力窮搜俾
無遺孽

同日

上諭內閣曰勒保奏查明川省歷年承辦軍務出力
文員懇請分別鼓勵著照所請龍安府知府積朗

阿夔州府知府周景福加恩賞給道銜打箭爐同
知恒敏綿州直隸州知州劉印全瀘州直隸州知
州趙立忠酉陽直隸州知州英貴加恩賞給知府
銜漢州知州周偉業知州銜馬邊廳通判趙華潼
川府通判王世燾夔州府通判鍾人傑嘉定府通
判張心敬加恩以同知直隸州陞用先換頂戴知
州銜東鄉縣知縣楊世鰲知州銜合江縣知縣王

泰雲加恩卽照加銜遇缺陞用達縣知縣余永寧
廣元縣知縣葉文馥彰明縣知縣張宏軒原任榮
經縣丁憂留川候補知縣張師范加恩以知州陞
用先換頂戴郫縣知縣呂朝恩雅安縣知縣魯鳳
輝南江縣知縣李心澄大竹縣知縣曾自柏蓬溪
縣知縣敬大科隣水縣知縣陳崇禮儀隴縣知縣
袁士繡梁山縣知縣符永培加恩賞給知州銜其

保寧府經歷趙秉璫等六員加恩以知縣陞用涪
州吏目鄧昂等十員加恩以府經歷縣丞陞用重
慶府經歷趙模等九員加恩以應陞之缺陞用隣
水縣教諭倪朝搢一員加恩以知縣陞用歸部卽
選候選從九品聶俞煥等二員加恩歸部先儘補
用投効雙月從九品投仁一員加恩歸部以不論
雙單月選用投効縣丞職銜汪鉉等五員加恩歸

部以雙月選用加捐布政司經歷現任蘆山縣典史朱鼎等三員加恩准捐分發留川補用此外尙有候補同知黃爲琳等五十三員加恩准其造冊咨部各歸本班儘先補用又摺內請將鹽茶道姚令儀等二百六十五員分列一二三等照軍營優敘之例分別給予議敘等語著加恩均照所請俟該省造送清冊到時交該部分別核辦各給議敘

以示獎勵又原任四川建昌道石作瑞據勒保奏
稱自開復原官辦理軍需又經三載有餘始終不
懈等語石作瑞前曾賞戴花翎開復後未經賞還
著加恩仍准戴用以示鼓勵又已革候補縣丞沈
昭典自伊犁釋回後仍在軍營効力尙有微勞著
加恩准其就近在川照例捐復補用其單開之鍾
蓮等二十二員均著加恩交部照軍營病故例賜

卹以示追獎勤勞至意

初五日丁酉吳熊光奏言竊查楚省零匪節次搜

捕所剩止有叅將李貴等所追之二十餘名據

巴東縣宣葆光稟報有數人竄至青谿地方經

寨勇入林搜捕殺傷二名生擒一名都司鄧興

相擒獲一名又據團勇寨員王斌第稟稱李貴

等帶兵至鬼原地方追上賊匪賊見兵勇無多

在山頂亂擲石塊兵勇間有受傷李貴等趕到
賊卽亡命狂奔由麻灣八卦廟向老林逃竄

臣

現飛札李貴等務窮其所向

臣

查零匪雖已無

多但仍恃險伏匿已令呢瑪善督率叅將李貴
遊擊李東宜金洪闢都司麻光裕分投上緊搜
剿該一路現有呢瑪善督率辦理此外並令營
總和隆武副將蔣觀濤帶領撤剌馬隊一百餘

名兼酌帶步兵前往上龕一帶駐劄又派都司
鄧興相等帶領官兵在房保交界之博磨坪遏
絕仍分飭邊界各鎮將一體派撥官兵探蹤迎
擊務期搜捕淨盡奏入

上命軍機大臣傳諭吳熊光曰吳熊光奏稱叅將李
貴等追趕之賊見兵勇無多在山頂亂擲石塊兵
勇間有受傷等語尋常案犯經州縣查拏緊急往

往拒捕傷差希圖脫身今該逸匪被追情急奔上山梁於官兵圍捕之時擲石抗拒尙係常有之事無足爲異惟當認真上緊追拏勿留餘孽現在楚省所餘賊匪僅止二十餘名爲數無多吳熊光當督飭所派將備悉力搜捕不得任意延宕或又以天氣漸寒時值陰雨爲詞總限於秋末冬初將各處深山密林逃匿餘匪一律辦淨不可稍涉鬆懈

同日河南巡撫馬慧裕奏言竊照豫省幅帙遼
闊撫標及南北兩鎮營共止額設兵九千九百
九十餘名分布於一百八廳州縣爲數本屬不
多節經前撫

臣

景安吳熊光遵

旨挑募新兵七千四百名併將開封團練鄉勇一千
一百四十三名作爲撫標兵丁先後仰蒙

俞允嘉慶五年正月二十九日欽奉

上諭賊匪蕩平之後豫省多留數千兵丁增添額餉
亦不爲糜費等因欽此茲查荆紫關等處上年酌
添營汛增設額兵二千七百二十四名曾於前
項新兵內挑補一千六百五十六名下餘糧額
因各兵原籍較遠難以強令前往是以未經撥
補卽就近於土著民人中另行招募足數其節
次所募新兵除挑補額缺并陸續視革外尙存

兵二千五百二名現在川陝楚三省業已肅清
邊防江防次第全撤所有前項新兵若因其尙
未補額概行裁汰不特訓練垂成棄之可惜而
歷年戍守曾著微勞且其中賢愚不一其無恒
業者居多必須妥爲安頓各得其所方不致有
滋事之虞惟有仰懇

聖恩俯准將前項未經補額新兵暫留各原營隨同

額兵一體差撙遇有缺出逐漸挑補約計二三年以內皆可補入營額現在所需餉銀應請照舊支給入於兵馬奏銷案內造報奏入得

旨軍機大臣議奏旋經慶桂等議奏准行

上從之

初六日

戊戌

方維甸奏言本月二十三日據盤屋

郭縣地方官稟報賊匪於二十一日由辛口略

黑水峪內竄出景峪該處堡長李進才集勇堵

剿殺賊數名鄉勇亦有傷亡

臣

查景峪與甘峪

澇峪相近雖係沿山然已在大山之外

臣

本擬

帶兵親往因現當凱撤之時恐涉張皇隨密派

叅將楊之震酌帶兵丁馳往堵禦茲於二十五

日據叅將楊之震鄆縣知縣王衡稟稱賊匪奔

走迅速業於二十二日由澇峪入山徑趨八里

坪瓦丁溝過嶺南竄距峪口已有二百餘里總
兵楊芳前敵官兵亦跟蹤緊追前進目下近山
一帶居民安堵如故並經鄆縣訊據被裹逃出
難民李更法供稱此股零匪約共男婦二百餘
人且有騾馬各等情現在賊向南竄楊芳前敵
兵勇已緊躡進剿楊芳由山內抄截楊遇春亦
自秦嶺西南探剿前來正可迎頭截住所有大

營及興奎等營官兵並楊遇春楊芳等征兵糧餉臣已飛飭妥爲供支奏入

上命軍機大臣傳諭額勒登保方維甸曰方維甸奏賊匪於八月二十一日由辛口峪黑水峪內竄出景峪經堡長李進才集勇堵剿殺賊數名二十二日賊匪由澇峪入山徑趨八里坪瓦子溝過嶺南竄楊芳現在帶兵跟追並據鄆縣訊據逃出難民

李更法供稱此股零匪約共男婦二百餘人且有
騾馬等語南山零匪從前祇剩二三十人節經飭
諭楊芳督兵追擊自應趕緊殲擒剋日淨盡乃遲
延日久以致該匪復有裹脅湊聚至二百餘人且
有騾馬皆由楊芳剿辦不力所致聞該鎮從前在
軍營帶兵原屬出力迨擢任總兵以後意存自滿
諸多懈弛今剿辦南山零匪不能迅速厥功予賊

以暇且景峪在大山之外賊匪業已竄掇出山次
日復由澇峪入山過嶺距峪口二百餘里楊芳所
司何事任令該匪等肆行無忌出入自如實屬怠
玩楊芳著先拔去花翎仍責令帶兵速剿以觀後
效並著額勒登保就近查明該鎮如何貽誤之處
卽行據實叅辦勿稍徇隱現在楊遇春雖已前往
迎剿恐未足深恃額勒登保在西鄉一帶安置兵

勇尙非緊要著卽馳赴南山督同楊遇春楊芳速
將此股零匪上緊辦淨毋致再有稽延德楞泰現
於初九日起程回任已諭令於過陝時前赴南山
計彼時零匪自己辦淨倘德楞泰到後尙有未完
餘孽額勒登保不必急於起程竟當在彼多住旬
日會同督辦務須搜剿無遺方可來京瞻覲方維
甸近在省城一得探報信息卽隨時馳奏以慰廑

注

初九日

辛丑

額勒登保奏言

臣

連日派兵入山督

緝零匪並辦理續撤官兵事宜據叅將李宗顯
都司張起鰲等帶領兵勇由川搜緝回營當將
所帶鄉勇逐一查點又詢出四川河南湖北陝
西貴州等省願回原籍者六百餘名隨照例收
繳矛桿給資送回其餘仍令隨同搜緝

臣

因陝

疆西面營卡六勇業已歸集分設齊全卽當向
東面紫陽安康一帶辦理隨派令遊擊劉元明
守備馬仕相帶領兵勇三百名由川界之金竹
壩至城口一帶搜緝又派都司劉勝祥守備齊
慎帶領兵勇三百名由元灘子至南溪場一帶
搜緝均令至南天門回陝臣卽由鹿池霸麻柳
壩茅壩關鐵匠溪鐵佛寺雙和塘班鳩關萬人

寨王于坪一路循川陝邊界東發沿途經過各
營卡細加查看兵丁均各壯健足數搜緝亦俱
嚴密民情實爲寧貼途次據

臣

派出搜山兵勇

回營報稱十六日搜至花藥山有一人形跡甚
屬可疑當將該犯搜獲訊係苟文明之弟苟文
渠當卽齮割示衆並將擒獲之兵勇寨民共賞
銀一百兩俾知踴躍至苟朝九一犯或存或去

尙無確據亦恐隻身改名易姓冀倖免脫現已
嚴飭川陝各路官兵設法留心緝獲以期盡絕
根株又據總兵劉瑞派兵搜山緝獲賊匪三名
遊擊國敏派兵搜山緝獲賊匪二名臣覆加親
訊內三犯確係子手當卽正法有一名實係被
裹隨卽省釋其餘據各處營卡具報派兵在於
各山林內梭巡按期會哨並無賊匪并據前次

派赴東面歸集兵勇之總兵王兆夢報稱已將
漳河坪防勇分別查點內有川黔楚豫願回原
籍者二百餘名已分別資送現向八仙河一帶

挨次查辦

臣

刻下行抵安康境內卽日向平利

鎮坪進發查閱各營卡兵勇並查察楚邊情形
再接楊遇春呈報十八日探悉南山零匪實有
八九十人由太平山紅河奔竄勢向西趨吳廷

剛帶兵尾追楊芳由青龍寨抄截楊遇春聞報
已由石塔寺取道黃柏岡二郎壩一帶設法趕
辦等情

臣

已疊飭楊遇春務須及早辦竣不得

再有遲延再

臣

接據總兵劉瑞稟報陝省綏德

營都司呂廷賢奉派帶兵徒步在川界老林搜
緝行至紫陽雙和寨因病身死等情該員在軍
營入載帶兵打仗素稱奮勇今因積勞身故殊

堪憫惜可否照例給予卹典之處出自

聖主恩施奏入

上命軍機大臣傳諭額勒登保曰額勒登保奏苟文
渠係首逆苟文明胞弟日久潛匿今被寨民盤獲
縛割示衆至苟文明之子苟朝九亦屬緊要賊目
恐其改易姓名幸圖免脫務須嚴行應緝毋任漏
網惟所稱南山零匪據楊遇春呈報實有八九十

人此則未確昨據方維甸奏報賊匪於八月二十
一日由辛口峪黑水峪竄出景峪經坐長集勇堵
截賊又由潞峪入山約共男婦二百餘人且有騾
馬等語額勒登保此時尙未得信可見地方官漸
形疎懈不隨時具報經畧山內零匪又復衰脅多
人湊聚肆竄楊遇春雖已帶兵迎剿究恐不足深
恃當卽降旨令額勒登保親赴南山督同楊遇春

等剿辦額勒登保現於安康一帶不過查閱營伍
尙非緊要之事於接奉前旨後想已星馳前往若
所帶之兵不敷搜剿不妨於所設各卡內擇其地
非要隘者將防兵酌留抽撥一二千名前往剿捕
以資得力其各處營卡雖據報派兵在山林內梭
巡並無賊匪但如現獲之苟文渠一犯久未見其
蹤跡何以忽又被擒恐似此隻身潛竄者尙復不

少若無兵搜緝又恐聚集成股額勒登保當嚴飭
沿山守卡將弁不得專在各卡株守必須實力排
搜彼此會哨使無一名賊匪藏匿方爲完善至都
司呂廷貴前在軍營打仗素稱奮勇今因積勞身
故著加恩照軍營病故例賜卹

十七日巳酉勤保奏言查黔省應撤官兵近日陸

續調至綏定派員管帶計官兵五起共二千四

百八十餘員名均查照

奏定章程按程給予鹽菜夫價俾利邁行至此起
官兵人數稍多若一路行走不免擁擠現在查
明該官兵等在黔省上游營分者由敘永廳所
屬之永寧縣出境在黔省下游營分者由重慶
府所屬之綦江縣出境再征兵以次凱旋征勇
亦須以次相間裁撤俾有鈴束查向來都司趙

琴管帶征勇四百餘名守備張必祿管帶征勇
六百餘名皆隨同總兵田朝貴在老山搜賊此
時老山零賊無多田朝貴所帶兵勇尙有二千
七八百名儘敷分撥毋庸再留此項鄉勇協剿
又軍功武玉龍管帶鄉勇九十二名向在臬司
劉清一路防剿經劉清撥赴田朝貴一路此時
亦當裁撤

臣

現均調至綏定收繳器械查明情

願入伍者註冊登記給予新兵錢糧其情願回
家安業者卽照

奏定章程賞給路費及歸途口食錢文派令軍功
人等管帶回籍仍飭各地方官查點收明交保
安業計此次所撤征勇又有一千一百六十五
名均各歡欣就道沿途安靜再連日各路鎮將
及地方團練人等四處搜捕據川北官兵在通

江青松崖搜獲零賊一名副將桂涵在觀音山
搜獲陳賊四名副將馬元在雲開交界盤獲逃
散陳賊一名守備李思貴在茅蓬山搜獲陳賊
一名臬司劉清一路搜獲賊匪一名東鄉縣南
壩場主簿趙炳然盤獲賊匪二名均審訊明確
檄行正法至近日川東川北官兵分路會哨均
無賊匪蹤跡惟田朝貴一路兵勇在太平沿邊

山內老林排搜尙有零星未淨之賊數十人

臣

又現飭總兵馬瑜就近派兵會同田朝貴實力排搜不使漏網奏入

上命軍機大臣傳諭勒保曰黔省官兵經該督陸續調回分起照料出境並將隨營征勇以次裁撤又於通江等處各將弁搜獲零匪數名概行正法自應如此辦理惟太平沿邊山內老林尙有零星未

淨之賊數十人現在田朝貴所帶兵勇計有二千
七八百名兵力不啻數十倍於賊儘數搜捕轉瞬
卽屆冬令該鎮將務於冬初悉數翦除不留一孽
仍施恩獎若遲至冬令不能淨盡必立降嚴罰斷
不姑息不許又以冰雪凝沍艱於前進爲辭予賊
以暇任其潛匿深山若再延至春月又復勾結多
人四路竄掠仍似往年光景則更不成事體矣勒

保接奉此旨當嚴行督催上緊辦淨不得稍涉鬆懈

二十日

壬子

額勒登保奏言查陝省鄉勇均已陸續

撤回原籍安插現只酌留二千一百餘名內

有一千二百餘名仍願隨營出力卽分派各營

隨同搜緝此內有無業可歸情願入伍者十分

之五業經詢明造冊刻下楊遇春一路留隨征

鄉勇五百餘名辦竣零匪卽行遣撤又臣一路

現留勇三百名俟臣回京時再行遣撤臣連日

由磚坪獅子壩豐口壩八卦廟曾家壩一路進

發查看新建城堡衙署兵房業經齊全應設兵

丁亦經召募足額而器械軍裝均已製備臣現次

曾家壩已接川楚邊界據探差回稱楚境只有

叅將李貴遊擊麻光裕等所追客匪一起除擒

殺外尙有二三十人由房縣竹山龍門壩竄入
老林山內藏匿李貴麻光裕數路官兵圍搜吳
熊光現又添派副將呢瑪善蔣觀濤都司鄧興
相分帶官兵前往截擊臣聞信隨飛札慶溥速
帶防兵與李貴等夾擊務期迅速辦竣并據川
省分防徐家壩之總兵馬瑜楚省分防竹筴一
帶之總兵慶溥均差弁來營稟報所管段內並

無零匪茲接准撫臣方維甸來信內稱南山零
匪於二十一日竄出景略經寨勇堵截旋於二
十二日由潞峪入山竄向八里坪楊芳前敵官
兵跟追而進並據難民供稱賊匪男婦約有二
百餘人且有騾馬等情初九日又據鎮安文武
稟報探得零匪二百餘人由寧陝八里坪江口
一帶東竄鎮安米糧寺初二日由茅坪羅家峽

東竄內有騾馬十數匹等情

臣

前已疊飭楊芳

加緊趕剿並令楊遇春帶兵入山督緝今該匪
晝夜狂竄遠颺自因官兵跟搜緊急但人數卽
有裹脅亦何致添至二百餘人之多是楊芳吳
廷剛不能上緊趕辦予賊以暇實有應得之咎
相應請

旨將楊芳吳廷剛翎頂先行摘去仍飭於一兩旬內

將該匪迅速捕竣稍贖前愆並聞該匪竄至江
口地方有焚燬兵房之事尙未據該營將備及
地方官稟報前來現已飛札嚴查俟查覆到日
另行奏

奏現聞楊遇春於初六日帶兵已趕抵鎮安距賊
不遠楊芳吳廷剛自必星夜追躡而來恐山路
紆迴或致距賊稍遠

臣

於隨營兵丁挑派馬步

勁兵六百餘名令參將特依順保劉健標遊擊
馬鳴玉帶領星夜馳赴鎮安境內緊顧東面截
擊並飛飭楊遇春楊芳吳廷剛分路兜擊務期
合力掃除不得再有延緩臣拜摺後親率官兵
亦卽由白土關興安取道就近督剿該匪人數
雖有一百餘名大半係屬新裹被脅同行並無
伎倆且鎮安一帶山勢較南山老林尙易施展

兵力

臣

親詣該處一帶督率官兵聲勢倍盛一

經趕及接仗即可掃蕩斷不致有滋蔓再陝西

富平營都司韋朝亮奉派在漳河坪防堵因請

領餉銀值雨後溪漲不期中流馬蹶被淹身死

該員隨征日久曾經立功可否給予卹典之處

出自

皇上天恩奏入

上命軍機大臣傳諭額勒登保曰南山零匪從前祇
有數十人經額勒登保派令楊芳吳廷剛帶兵趕
剿彼時朕卽諭令楊遇春入山督捕額勒登保猶
以爲似可無需復經朕降旨嚴催額勒登保始令
楊遇春前往今楊芳等剿辦已閱數旬楊遇春始
行趕到非惟不能將餘匪悉數殄除轉令裹脅至
二百餘人且有騾馬公然竄至鎮安並敢焚燬兵

房肆行無忌已有遺灰復燃之勢看來馳奏肅清
以後不特帶兵人員心存懈弛卽額勒登保亦未
免急思凱旋稍有鬆勁以致搜捕不力餘匪得復
行裹脅且所稱零匪男婦尙有二百餘人之語係
得自方維甸之來信及鎮安文武稟報而楊遇春
楊芳等竟不將賊數據實具稟卽川楚二省均尙
有零匪數十人額勒登保此時尙係經畧大臣各

路搜緝餘匪情形自應均向稟報乃摺內並未提
及似亦未經得有信息可見各路鎮將等並不上
緊追捕諸事因循卽其明驗楊遇春著拔去花翎
楊芳前已降旨拔去花翎著再摘去頂戴吳廷剛
亦著摘去翎頂均著傳旨嚴行申飭如再不奮勉
定當從重治罪決不寬恕額勒登保亦著傳旨申
飭現在楊遇春等已抵鎮安分路追剿額勒登保

亦已親往督辦著卽嚴飭該提鎮等合力兜圍自
東向西截剿務於十月內將此股零匪殲盡固不
可使之竄入豫境亦勿令闖入二竹界內此時額
勒登保尙有搜捕事宜卽德楞泰到陝亦不准卽
行來京俟辦竣此股零匪卽當用五百里馳奏候
朕諭令進京再行起程總當上緊督率趕辦剋期
完竣轉瞬匝寒又復冰雪載途若再稍有意玩遲

逾冬令或餘匪別有蔓延他竄不特將楊遇春楊
芳吳廷剛等嚴行懲治卽額勒登保亦不能辭罪
矣凜之勉之至現撤各兵如有尙未出境者仍當
酌量暫留其應撤鄉勇本係無業之徒惟利是趨
此時零匪尙在奔竄或該勇等散遣之後無所依
歸又思入夥不可不預爲防範著額勒登保酌量
情形如現撤之勇尙有未出陝境者卽就近截回

帶同搜捕暗事羈縻統俟剿盡南山零匪後再行
裁撤庶不致有潛往濟惡之虞再此股零匪既有
二百餘人自必有率領爲首之犯額勒登保亦當
確切訪查如有首惡仍應懸立賞格設法擒獲餘
匪更易並除其川楚餘匪數十人並著額勒登保
連飭田朝貴馬瑜及慶成慶溥李天林吉林泰等
加緊搜捕務於十月內一律剿盡勿再延緩致干

嚴譴韋朝亮隨征日久因請餉淹蹇情殊可憫著
加恩照軍營病故例賜卹

上又命軍機大臣傳諭德楞泰曰德楞泰自京回任
時已諭令路經陝省卽前赴南山將所餘零匪脅
率趕緊辦竣本日據額勒登保奏南山零匪約有
男婦二百餘人且有騾馬已竄至鎮安米糧寺由
茅坪羅家峽東竄並聞竄至江口地方有焚燬兵

房之事南山零匪前祇數十人今又聽其裹脅至
二百餘人且帶有騾馬沿途焚掠已竄至鎮安地
界看來自奏報肅清後帶兵大員及將領等均不
免鬆勁已降旨申飭令額勒登保速赴鎮安督剿
並將楊遇春拔去花翎將楊芳吳廷剛革去翎頂
令其戴罪自効計德楞泰此時已將抵陝省著卽
馳赴鎮安會同剿辦德楞泰行至陝境遇有裁撤

兵勇擢其得力者卽酌量帶回幫同剿賊此內鄉
勇一項尤應留意該勇等本無恒業惟利是趨恐
裁撤後無業可歸一聞殘匪聚集又復潛往助惡
不如乘便帶往統俟將此股賊匪二百餘人剿淨
後再行裁撤方爲妥善此時額勒登保已挑派勁
兵過賊東竄之路並親帶官兵由白土關與安取
道前進再得德楞泰前往會剿自當就地一鼓殄

集三才子集卷一
除不但不可令其竄入豫境亦斷不可令其再逸
入二竹又延時日總期於一兩旬內迅速全行辦
淨此爲至要

同日吳熊光奏言竊楚省零匪雖已無多惟該
匪愈少愈猾官兵追捕緊急則深入老林四散
狂奔官兵追離稍遠復又漸次聚集乘間出擾
並有三五成羣晝伏夜出劫掠居民財物其中

難保無落後隨營夫勇潛匿各處冒賊搶食此等匪徒亦惟有照賊匪一律辦理現據叅將李貴游擊李東宣金洪嗣稟報該將等所辦零匪追至房縣百草冲地方老林之內擒獲賊匪張明鑑等五名將該犯等同寨員朱恂所獲賊匪一名一併解送前來

臣

親提查訊據稱此起零

匪現係王世輝管事從前原有一百多人被官

兵節次剿散現在王世輝祇帶了真賊二十四
人想竄回四川等語訊明後當將該犯等分別
辦理又據總兵吉林泰稟報都司張代鳳在九
條嶺搜獲賊匪一名守備陳洪道在陳家灣搜
獲一名就近解交提臣慶成審辦並據副將蔣
觀濤報稱五塘口老林內零匪十餘名現在竄
往楸木園帶兵往搜等語此起是否卽係叅將

李貴等追散之賊抑係零匪攢聚尙未明晰現
飭加緊搜擒以清餘孽又據竹山縣稟報李貴
等所追零匪勢向竹谿之向家壩奔竄臣於日
內卽前赴竹谿就近督催各鎮將趕緊搜捕並
順道將竹谿竹山二處新設營汛及增募新兵
逐加察看以期妥協

吳熊光又奏言

臣欽奉

上諭德楞泰前次殲斃齊王氏姚之富等實屬鄖西鄉勇認真出力著傳諭吳熊光詳查該縣從前所帶鄉勇是否自行出資雇募孔繼樞現在有何加銜曾否賞戴翎枝據實具奏等因

臣

查嘉慶三年

二月間齊王氏姚之富竄近鄖西雖時係原任撫臣汪新派令總兵路超吉帶兵二千名道員王正常張道源督同鄖西縣知縣孔繼樞帶領

練勇分路防堵此項練勇係官給口糧俱有開
銷至齊王氏姚之富等竄至上津之張家灣經
該處義勇數千人截住溝口向前衝擊適官兵
追至兩面夾攻齊王氏姚之富等無路逃生俱
跳崖跌斃此項義勇係該縣民人郭友桂榮等
爲首各自捐糧團練爲保護村莊而設截擊齊
王氏等實係義勇之功該勇等因擊斃齊王氏

姚之富恐各股賊匪到彼復讐嗣後堵禦益嚴
是以最稱勇敢該縣知縣孔繼樞雖無捐貲雇
募之事但能曉諭百姓自相團練尙屬能事查
該員曾蒙

恩賞給陞銜頂戴一級嘉慶六年二月內前督臣書
麟以孔繼樞團勇堵賊有功奏

加恩賞戴藍翎欽奉

上諭將該員存記俟殲擒徐張二逆時再行保奏嗣該逆徐添德等復竄往陝省未能在楚就擒書麟等亦不敢再保茲蒙

聖明垂詢理合據實覆

奏再該縣義勇首郭友桂榮曾經前撫臣汪新給與行營千總執照桂榮年力壯健臣已撥歸鄖陽鎮標學習郭友不願入營謹一併據實奏

聞奏入

上命軍機大臣傳諭吳熊光曰楚省零匪節據吳熊
光奏到所剩實已不多正在盼望肅清乃本日摺
內復據奏稱該匪愈少愈猾官兵追離稍遠又漸
次聚集乘間出擾並有三五成羣晝伏夜出擄掠
居民者其房縣奔竄之賊前派將領等跟蹤追剿
已閱數旬而叅將李貴等此次報獲僅有六名其

爲首之僞總兵王世輝等及該犯所帶真正矛手
二十四名又被逃逸總未趕緊搜捕淨盡看此情
形各路鎮將等見賊數無多俱不免意存鬆懈設
再因循致遺灰復燃成何事體提督慶成總兵慶
溥李天林吉林泰等及帶丘各員均著傳旨申飭
現在賊首王世輝等帶同真賊二十四名究竟逃
往何處其蔣觀濤所報揪木園竄匪十數名是否

卽係此股追散之賊吳熊光當督率鎮將上緊追
躡並一面由二竹地方派兵堵截務將此二十四
名賊匪盡數殲擒勿令一名逃匿至賊首王世輝
尤關緊要吳熊光並當懸立賞格俾將弁兵勇人
人鼓勵剋期弋獲此內查遇有實在奮勉出力者
仍當據實保奏候朕加恩如有仍前疎懈者亦當
衆公叅奏不可姑息目下天氣尚暖搜捕不難吳

熊光當飭鎮將等務於十月內將境內零匪一律
辦淨勿再遲至天寒雨雪之時遷延干咎也

同日

上諭內閣曰前據德楞泰奏稱伊從前藏斃齊王氏
姚之富等實由鄖西縣所募鄉勇認真出力曾降
旨令吳熊光查明具奏茲據奏稱其時鄉勇係縣
民郭友桂榮爲首經該縣孔繼樸曉諭自相團練

等語該縣孔繼榘練集義勇素爲得力前次齊王
氏姚之富等竄至該縣得以隨時就擒實屬能事
現已大功全蕆自應加之優獎孔繼榘著加恩賞
加同知銜並賞換花翎義勇桂榮著加恩以千總
卽用其郭友據稱不願入營著加恩賞給千總銜
用昭獎勵

二十五日

丁巳方維甸奏言竊南山地方遼闊林

深箐密最易藏奸不特剿散零匪急須搜捕且
有從前隨營長夫落後鄉勇流落南山與山內
匪徒勾結乘機搶掠必須認真嚴緝弭患未萌
據署留壩同知劉經署鳳縣知縣潘彭年稟稱
會同營員拏獲搶掠匪犯馬洪等九名又據江
口叅將李英多稟報拏獲搶掠匪犯沈德成等
六名寧陝廳稟報饒峯地方有搶掠匪徒姚大

等七名亦經搜山兵丁拏獲

臣

已將現獲之匪

犯二十二名飛札提省審明後另行按例定擬

具

奏至剿散之零星賊匪現據叅將李英多盤獲同
登朝一名本係張漢潮夥黨後入苟文明股內
屢次抗拒官兵業據供認不諱該犯解至中途
染患時症身死當將該犯戮屍梟示又據寧陝

廳同知張約稟報寨勇姬光榮擒獲賊匪雷明
一名解送到省訊係在苟文明斬土黃股內充
當旗手當卽恭請

王命處斬至前竄涉峪八里坪賊匪連日復據孝義
鎮安等廳縣及叅將李英多稟報該匪竄至寧
陝江口經叅將李英多帶兵截擊千總馬大剛
衝入賊隊殺賊數名馬大剛頂中矛傷陣亡賊

匪竄至七里橋李英多緊躡追截適楊芳前敵官兵趕到分路截殺又斃賊數名生擒活賊一名因傷重當即正法賊匪因楊芳兵已趕到并有舊縣關營守備孫榮分路追截卽由鎮安羅家峽月西溝竄至洵陽之三岔溝沿途亡命奔逃不敢停留楊芳帶兵星夜抄截楊遇春由兩河關追剿俱已逼近賊蹤官兵當已得手奏入

上命軍機大臣傳諭方維甸曰此次陝省地方文武
拏獲各處搶掠匪犯共二十二名雖據稱均係山
外游民現在山內零匪亦必係此輩或卽由山內
潛出隨地擄掠亦未可定該撫提省審明後應卽
加等嚴辦以儆兇頑至山內餘匪前據該撫奏裹
脅至二百餘人且有騾馬今公然成隊可見賊匪
又有遺灰復燃之勢現據叅將李英多等斬獲數

名又寨勇等盤獲逃出之賊數名合之節次拏獲
搶掠之犯二十餘名山內賊匪自應稍形減少且
該匪等竄至洵陽之三岔溝地方該處山勢稍開
兵力易於施展而額勒登保楊遇春又均帶兵來
陝該撫應飭催楊芳等上緊追躡以便與額勒登
保等會合夾擊速行殲盡一得捷音迅速馳奏所
有殺賊陣亡之千總馬大剛著咨部賜卹